

avisi da Constantinopoli, fo in persona dal comendador Covos et li disse le nove de l'ussir de l'armata turchesca. Disse soa signoria di quà inanti convenirà vi avisamo nui de progressi dil Turco, come fin hora ha fato verso de nui la Signoria, et disse teneva conto el Signor turco esser gionto el dì inanzi o el dì de San Zuane a Belgrado, perchè a dì 17 alozò a uno loco cinque zornate lontano, et che la Cesarea Maestà havia bon animo et sperava obtenir vittoria, et che oltra li socorsi de la Boemia et di l'imperator sariano fanti 32 milia pagati da Cesare; et esser letere ch'el marchese dil Guasto condurà con se 10 milia spagnoli et 10 milia italiani, tutta bellissima gente, oltra li alemani se faceva, i quali sariano ad ordine al principio de questo mexe, et che li do capitanei Themis et Maximiliano erano al lago de Costanza, et hanno il danaro da far li fanti. *Item*, disse, el lexè una letera di Zenoa, venuta in giorni 6, de la grossa armata de domino Andrea Doria con la lista de le nave 30, de le qual do erano de bote 200 l'una, el resto assà grande, armata abastanza da contrastar con quella dil Turco, qual se dice ha galie, 45 dito Doria, et 30 nave grosse et il capitano valorosissimo et de l'experientia l'è. Poi disse che fa la Signoria? che non aiuta la Cesarea Maestà in questa impresa? et meta da canto questi soi rispeli, se la vostra armata con la nostra fusseno insieme pareriano el turco in Constantinopoli. L'è sta rezercà a far nova intelligentia et unirse, più non ha voluto, esso orator li rispose non era necessario far altro, hessendo conjontissimi etc. Scrive et prega la Signoria lo illumini a parlar. Et have la letera al capitano de Pixin, qual per esser in tedesco non la manda. Eri matina introno qui fanti 1000 de la cità de Norimberg, vanno in soccorso de Viena, l'obligation sua è de fanti 500 et ne ha mandato 500 de più. Dicono Augusta, Ulma et Argentina farano el medesimo et fin 3 zorni sarano qui. Et scrive haver fato contar le file 150 a cinque per filo, fanti 750, *tamen* li pagano per 1000, erano con tre capitani sopra ronzi et sono *solum* do bandiere, bella zente, la mità archibuseri, ma non sono ben armati. Questi montorono in barca a l' hora de vespero, et presto i sarano in Viena.

223\* L'imperator hozi è veguto qui per atroyarse in la dieta per far el recesso, tornerà questa sera a li bagni, se contenta molto star lì perchè negotia el dopio che non fa de qui.

De la dieta de Norimberg se intende esser sta fata certa resolution, che vi vanno come li piace

*usque ad futurum concilium* nè li pol esser inferita alcuna molestia, et per tal concession li principi lutherani contribuivano al soccorso contra Turchi et 4 terre principal zoè Ulma, Norimberg, Augusta et Argentina, et cadauna darano più de quello li toca. *Item*, manda la copia de la letera dil Vayvoda al re di Polana sottoscrita.

*Da Sibinico, dil conte et capitano, di 6, ricevute a dì 16 Lulio.* Eri al tardo è gionto qui uno servitor dil reverendo prè Zorzi abate, mandato per mi, el qual partì heri da Cluino. Referisse luni fo a dì primo de l'istante, uno capitano over gubernator de Lubiana nominato Chocianer con circa 4000 cavalli et pedoni, sapendo la partita del bassà di Bossina et sue gente, esser corso fina per mia 4 in 5 arente Cluino et haver sachezato Unaz et Clamez vilazi turcheschi, et depredato grandissima quantità de animali si grossi come menuti et brusato le stanzie et fato captivi molti de diti morlachi, *ita* che dice dito nuntio tuti quelli loci turcheschi confinanti erano in fuga et li volseno seguir alcuni turchi et morlachi a piedi, sperando recuperar qualche parte de la preda, et furono morti molti di loro *maxime* li pedoni sono malmenati con pochissimo danno de li depredanti, quali subditi dil re Ferdinando si vedeno la ruina adosso, vanno tentando la fortuna, dubito non se lauderano dil merchà. El sanzaco de Bossina et dil ducato e gente loro è cavalcato a la volta de Serim.

*Da Constantinopoli, di sier Piero Zen orator et vicebaylo, di 6 Zugno, ricevute a dì 16 Lulio.* L'ultime mie fu de 27 de mazo, da poi se parti de qui el resto de le galie, fuste 4 restò et non sono andate per mancamento de zurme, el capitano de l'armata penso sia partito di secreto, el messo mandai col comandamento al predito capitano non è ancor tornato. È venuto nova, per olachi spazati de Anatolia, che el galion de Bellomo con 2 galiote erano stà prese a l'isola de Cipro, essendo a fero sopra Baffo, di questo questi hanno gran contenteza che el fiol dil Moro et Curtogli con 7 galie li havemo preso, et diti olachi sono andati in campo dal Gran signor qual se atrova a la volta de Nis et erano sta mandati alcuni chiaus a incontrar li oratori dil re Ferdinando, i qual erano propinqui a Nis, Idio ve pongi la sua mano. A dì 3 ricevute letere di 27 april, sono stato con Mamuth Celebi defferder et ditoli l'avisò, me disse metesse in substantia in Turco et lui drizeria al bassà, et cussì ho fato et è sta spazate. Disse dito Mamuth el Signor va con gran animo per ritrovar li soi inimici et con